

**Timersortartut nuna sinnerlugu unammisartut sungiusaqatigiittarnissaminnut periarfissagissaarnerulernissaat misissoqqullug Naalakkersuisut peqquneqarnissaannik Inatsisartut aalajangiiffigissaattut siunnersuut. Misissuineri annermik angallannermut akit qaffaseqisut unamminarsinnaaneri immikkut isiginiaqquneqarput. Naalakkersuisut Timersoqatigiit Kattuffiannut, specialforbundinut kiisalu allanut soqutigisaqaqatigiinnut susassaqtunut attaveqaqquneqarput siunertaralugu misissuinermit UPA2020-mit Inatsisartunut agguanneqartussamut, peqataatitsinissaq.**  
(Inatsisartunut ilaasortaq Nivi Olsen, Demokraatit)

## **Pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap**

## **ISUMALIUTISSIISSUTAA**

### **Siunnersuutip aappassaanneerreqarnerani tunniunneqartoq**

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap suliaqarnermi kingullermi makkuninnga inuttaqarpoq:

Inatsisartunut ilaasortaq Doris J. Jensen, Siumut, siulittaasoq  
Inatsisartunut ilaasortaq Mimi Karlsen, Inuit Ataqatigiit, siulittaasup tullia  
Inatsisartunut ilaasortaq Laura Táunâjik, Siumut  
Inatsisartunut ilaasortaq Nivi Olsen, Demokraatit  
Inatsisartunut ilaasortaq Sofia Geisler, Inuit Ataqatigiit

UPA2019-imi ulloq 8. maj 2019 siunnersuutip siullermeerlugu oqallisigineqarnerata kingorna siunnersuut ataatsimiititaliamit misissorneqarpoq.

### **1. Siunnersuutip imarisaa siunertaalu**

Timersortartut nuna sinnerlugu unammisartut sungiusaqatigiittarnissaminnut periarfissagissaarnerulernissaat misissoqqullugu Naalakkersuisut UPA2020-mut peqquneqassasut siunnersuutikkut kissaatigineqarpoq, angallannermut akit qaffaseqisut unamminarsinnaaneri immikkut isiginiaqquneqarput. Naalakkersuisut Timersoqatigiit Kattuffiannut, specialforbundinut kiisalu allanut soqutigisaqaqatigiinnut susassaqtunut attaveqaqquneqarput peqataatitsinissaq siunertaralugu.

## 2. Allannguutissatut siunnersuut

Siunnersuutip siullermeerneqarneranut atatillugu Inuit Ataqatigiit allannguutissatut siunnersuummik saqqummiussippot imatut oqaasertalimmik:

*Timersorneq timigissarnerlu pillugit inatsisartut inatsisaata nr. 15, 6.juni 2016meersup nalilersuiffigeqqinneqarnissaa pillugu Naalakkersuisut peqquneqarnissaannik inatsisartut aaliangiiffigisassaattut siunnersuut. Timersoqatigiit Kattuffiat, specialforbundet, attuumassuteqarsinnaasullu tamaasa peqatigalugit nalilersuineq ingerlanneqassaaq, ilaatigut nunanut allanut unammisartuutitta sungiusarnissaannut unammisaqattaarsinnaanerannullu tunngasut aammalu timersoqatigiiffiit timigissartartullu ulluinnarni atugarisaannut tunngatillugu, aningaasatigut sinaakkusiunneqartartut inatsimmu sanilliullugit ullutsinnut naleqqunnersut nalilersuiffigineqassallutik. Nalilersuineq inassuteqaatitalik naammassereersimassaaq inatsisartunullu agguanneqareersimassalluni UPA 2020 sioqqullugu.*

Ataatsimiititaliap paasivaa, allannguutissatut siunnersuutip pingaartikkaa inatsisitigut killiussat pingaarnert nalilersorneqarnissaata ukkatarigaat nuna tamakkerlugu unammisartut kisiisa ukkatarinagit nalinginnaasumik timersortartut aamma ilanngunneqassasut. Siunnersuutaaqqaartumut sanilliullugu allannguutissatut siunnersuut allaanerusoq ataatsimiititaliap nalilerpaa. Tamanna isumaqarpoq, allannguutissatut siunnersuutigineqartoq taamatut isikkoqarluni akuerineqassagaluarpat, Naalakkersuisut suliaq kissaatigineqartoq naammassissallugu pisussaaffigissanngikkaat<sup>1</sup>, siunnersuutaaqqaartoq imaluunniit allannguutissatut siunnersuut Inatsisartuni marloriarlutik suliarineqarsimassanngimmata. Qanorluunniit siunnersuut ilalernartigigaluarpat tassunga atatillugu allannguutissatut siunnersuut ataatsimiititaliap tapersersinnaanngilaa.

## 3. Ataatsimiititaliap siunnersuummik suliarinninnera

Katerilluni sungiusaqatigiittarnernut, unamminernut il.il. taakkununnga aningaasartuutit nalinginnaasumik ajornartorsiutaasartut nalinginnaasumik ilisimaneqarput. Timersoqatigiit Kattuffiata aammalu Elite Sport Greenlandip suliniutigisartagaat pillugit Naalakkersuisut oqariartuutaat ataatsimiititaliap annertuumik paasisinnaavaa. Assigiinngitsuni nalinginnaasumik timersornerni tamani nammineq piumassutsimik iliuseqartarnek namminerlu piumassutsikkut ikiuuttarnermik periuseq ataatsimiititaliap tapersersorpaa. Ataatsimiititalialli siunnersuutaasup siunertaa paasivaa, nuna tamakkerlugu unammisartut katerillutik sungiusartarnerini angallannermut akit qaffasissusaat immikkut ukkatarineqaraluartut taakkua kisimik pineqanngitsut ataatsimiititaliap paasivaa. Aammattaaq soqutigisallit siuliani taaneqartut Naalakkersuisut misissuillutik sulinerminnut atatillugu

<sup>1</sup> Pisussaaffik pineqartoq Inatsisartut suleriaasiani § 33, imm. 5-imi takuneqarsinnaavoq.

attavigissagaat siunnersuuteqartup siunnersuutigimmagu ataatsimiititaliap maluginiarpa.

Siunnersuutigineqartoq taamatut isikkoqarluni akuersissutigineqassappat, oqartussanit tapiisarnerit tapiinissamullu periarfissat misissoqqissaarnissaat Naalakkersuisut iluatsillugu suliarissagaluarpaat – annertussusaa kisiat pinnagu aammali ilusaa. Siunnersuutigineqartoq ilaasunik angallassisartut GIF/Elite Sport Greenlandillu akornanni toqqartumik isumaqatigiinniarnertut ataatsimiititaliap killilerlugu periarfissanillu misissuissutaannartut isiginiangilaa. Taamaasillugu Kalaallit Nunaanni angallannermi akit qaffasissut pillugit timersortartut nuna sinnerlugu unammisartut atuisutut qaangiiniarnissaasa misissorneqarnissaat siunnersuutip allaaseraa.

#### **4. Siunnersuutip aningaasatigut kingunerisassai:**


Inatsisartut suleriaasaanni § 33 imm. 1-imi takuneqarsinnaavoq, aalajangiussassatut siunnersuutip allaffissornermi aningaasatigullu kingunerisassai siunnersuutip tungavilersuutaani nassuiaatigineqassasoq.

Ataatsimiititaliamit maluginiarneqarpoq siunnersuutip piviusunngortinneqarnerani aningaasatigut kingunissaritinneqartut siunnersuummut naapertuuttut. Tamatumunnga allatigut oqaaseqarnissamut ataatsimiititaliamit pissutissaqartinneqanngilaq.

#### **5. Ataatsimiititaliap inassuteqaatai**

Ataatsimiititaliap **isumaqatigiittup** siunnersuutaaqartoq **akuerineqassasoq** inassutigaa.


Taamatut oqaaseqarluni isumaliutissiissummilu allassimasutut paasinnillutik matumuuna siunnersuut ataatsimiititaliap aappassaaniigassanngortippaa.



Doris J. Jensen  
Siulittaasoq




Mimi Karlsen  
Siulittaasup tullia



Laura Táunâjik

PVA: 

Nivi Olsen



Sofia Geisler